

TARIKH	21/5/2015	MUKASURAT	24
HARI	KHAMIS	RUANGAN	DALAM NEGERI

Sumbangan menerusi tajaan, sekolah angkat dan program klinik hoki

Melahirkan pemain hoki bertaraf dunia

PADANG Kelab Kilat yang menghijau di pekarangan Ibu Pejabat Tenaga Nasional (TNB) di Bangsar, bukan sekadar padang biasa apabila menyimpan rahsia lebih 40 tahun kejaguan Malaysia di persada hoki antarabangsa.

Kilat adalah nama kelab sukan TNB yang sinonim dengan hoki dan padang itulah menjadi antara gelanggang Kejohanan Hoki Piala Dunia 1975, yang menjulang Malaysia menjadi empat pasukan terbaik dunia.

Malah, lama sebelum itu, Kilat di bawah payung Lembaga Letrik Negara (LLN), kini TNB, menyumbang kepada pembangunan sukan hoki dengan melahirkan atau menaungi ramai pemain kebangsaan.

Hoki bukanlah sukan yang dapat memberikan pendapatan atau elaun besar kepada pemainnya, lantas TNB mengambil mereka sebagai kakitangan sambil diberikan pelepasan untuk menjalani latihan dan mempertingkatkan keupayaan.

Hasilnya, walaupun tidak mewah dan tiada penajaan melimpah, hoki negara sentiasa berada dalam kelompok 10 atau 15 pasukan terbaik di dunia, agak konsisten berbanding sukan lain yang lebih popular di negara ini.

"Ramai legenda hoki negara lahir di Padang Kelab Kilat ini, dan sehingga hari ini, TNB masih terus memainkan peranan dalam sukan hoki negara," kata bekas pemain hoki kebangsaan, **Nor Saiful Zaini Nasiruddin**.

Sekadar menyebut beberapa nama, Poon Fook Loke (kini Datuk), Foo Keat Seong dan Allahyarham Razak Leman adalah antara nama yang dinaungi TNB menjadi aset hoki negara yang sudah menghiasi dewan kegemilangan olimpik negara.

Beberapa dekad kebelakangan ini, muncul nama-nama sepertiendi Chua Boon Huat, Mirmawan Nawawi, K Embaraj, Ahmad Sayuti, S. Sivabalan, K Rajan dan Nor Saiful Zaini sendiri yang kini mengetuai Unit Sukan dan Ketua Pembangunan Hoki TNB.

Nor Saiful Zaini, 49, adalah antara pakar sudut penalti negara, menyarung jersi kebangsaan dalam tiga Sukan Olimpik iaitu di Barcelona (1992), Atlanta (1996) dan Sydney (2000).

Menurutnya, peranan TNB dalam memperkasakan sukan ini amat besar dan menjadi satu-satunya syarikat

Better. Brighter.

berkaitan kerajaan (GLC) yang amat serius dalam membangunkan sukan hoki termasuk mengasah bakat baharu seawal usia sembilan tahun.

Selain memberikan pekerjaan kepada pemain-pemain hoki, TNB menjadi penaja utama Liga Hoki Malaysia (TNB-MHL) sejak tahun 2006, mewujudkan program sekolah angkat hoki serta pembangunan klinik hoki sekolah PINTAR TNB bermula tahun 2009.

Mulai tahun 2006, TNB menjadikan Sekolah Sukan Tunku Mahkota Ismail (SSTMI), Johor yang dahulunya Sekolah Sukan Bandar Penawar, sebagai "anak angkatnya" manakala Sekolah Sukan Pahang, Seberang Temerloh (SSP) pada tahun 2014. Dua lagi sekolah akan dimuktamadkan untuk tujuan yang sama pada tahun ini.

Menerusi program klinik hoki sekolah PINTAR TNB pula, bimbingan diberikan kepada murid-murid di bawah umur 12 tahun di 37 buah sekolah terpilih di seluruh negara.

Atas komitmen yang jitu TNB, Kementerian Pengajian Tinggi telah melantik syarikat utiliti elektrik itu melalui Universiti Tenaga Nasional (UNITEN), memainkan peranan sebagai Pusat Kecemerlangan Sukan Hoki peringkat universiti tempatan.

Nor Saiful Zaini yang kini Penolong Jurulatih pasukan kebangsaan berkata, penumpuan TNB di peringkat sekolah-sekolah telah membitkan hasil dengan ramai yang menyarung jersi kebangsaan masa kini seperti Marhan Jalil, Firhan Ashaari, Faizal Saari, Fitri Saari, Shahril Saabah, Faiz Helmi Jalil, Ramadhan Rosli, Md Hafizuddin Othman, Mohd Noor Faez Ibrahim dan Mohammad Izad Hakimi.

Datuk Poon Fook Loke, 64, pula berpendapat tanpa TNB, program pembangunan hoki yang melibatkan pihak lain termasuklah kelab-kelab sukan hanyalah berbentuk *ad hoc*.

"Sumbangan TNB dalam membangunkan hoki negara sejak tahun 70-an amat besar. Kini, program mencungkil bakat muda sejak awal-awal lagi amatlah penting.

"Langkah TNB cukup tepat, fasa pembangunan awal hoki bermula di peringkat sekolah rendah dan seteru-

rusnya dipromosikan secara aktif di peringkat sekolah menengah.

"Dari situ, pemain-pemain berpotensi dipilih dalam kejohanan bawah umur 12, 14 dan 16 tahun untuk mewakili negeri-negeri," katanya.

Penasihat program hoki di SSTMI, **Lailin Abu Hassan** memperakui ramai pemain pelapis kebangsaan berjaya diketengahkan sejak sekolah itu dijadikan sekolah angkat TNB bagi pembangunan hoki.

"Saya berbangga kerana dalam sesi pemilihan, beberapa pemain remaja dari SSTMI iaitu Faiz Helmi Jalil, Firhan Ashaari dan Faizal Saari diserapkan ke pasukan hoki senior negara.

"Separuh daripada pemain hoki negara hari ini berasal daripada pasukan hoki remaja SSTMI," ujarnya yang turut melatih pelajar prauniversiti sebagai persediaan pemilihan Liga Hoki Remaja setiap tahun.

TARIKH	21/5/2015	MUKASURAT	24
HARI	KHAMIS	RUANGAN	DALAM NEGERI

Bertanggungjawab melatih pemain-pemain tingkatan satu hingga tingkatan lima, Lailin menjelaskan, pada awalnya mereka menganggotai pasukan remaja TNB-Thunderbolts yang muncul juara Liga Hoki Remaja Malaysia lima tahun berturut-turut sejak tahun 2010,

"Saya bersama-sama beberapa

bekas pemain Olimpik turut membantu pemain-pemain hoki kebangsaan membuat persediaan menjelang Sukan Olimpik 2016 di Brazil.

"Pemain-pemain diberi tunjuk ajar taktikal terbaik berlandaskan kemahiran dan pengalaman yang kami peroleh selama ini,"katanya yang mewakili negara di Sukan Olimpik Barcelona dan Atlanta selain Piala Dunia di Amsterdam.

Malah, **Lailin**, 45, yang tugas hakikinya Pembantu Tadbir Kanan TNB, dipelawa menyertai beberapa beberapa jurulatih TNB, untuk mengendalik klinik anjuran persatuan-persatuan hoki negeri dan Maktab Rendah Sains MARA (MRSM).

Tumpuan Jurulatih Pembangunan Hoki RemajaTNB, **M. Kaliswaran**, 39, pula adalah barisan pemain bawah 12 tahun untuk program klinik hoki sekolah PINTAR dan lebih 10 jurulatih terdiri daripada bekas pemain Olimpik menganggotai pasukan jurulatih TNB-Thunderbolts.

Bekas pemain Olimpik Atlanta berpuas hati dengan bantuan TNB yang menawarkan pekerjaan tetap kepada bekas pemain-pemain hoki negara termasuk dirinya.

"Saya aktif bermain hoki pada usia 18 tahun dan bekerja sebagai pem-

bantu tadbir di TNB ketika berusia 24 tahun," katanya.

Bagi **Mohd. Madzli Ikmar Mohd Nor**, 36, sejak bermain untuk pasukan TNB pada tahun 1999, bakatnya berkembang sehingga mewakili negara dengan 323 penampilan antarabangsa.

Bekas kapten skuad kebangsaan ini, pernah membantu pasukan Malaysian memenangi pingat perak di Sukan Asia 2010 di Guangzhou.

"Tanpa bantuan dan sokongan TNB, saya rasa tidak mungkin Malaysia mencipta sejarah mendapat pingat di Sukan Asia untuk hoki," katanya yang ketika ini mencurahkan pengalamannya sebagai penasihat hoki di Sekolah Sukan Pahang.

Faiz Helmi Jali, 23, pula berkata, selain mendapat latihan hoki, beliau turut diberi peluang melanjutkan pelajaran di institusi pengajian tinggi dalam bidang Pengurusan Sukan di Fakulti Pusat Sukan, Universiti Malaya.

Pembantu tadbir TNB ini mewakili pasukan kebangsaan sejak lima tahun lalu. Bekas pelajar SSTMI ini ditawarkan menganggotai pasukan TNB-Thunderbolts selepas menduduki Sijil Peperiksaan Malaysia (SPM) dan ketika berusia 19 tahun, terpilih mengikuti Jelajah Hoki Remaja Eropah.

REAKSI



"**RAMAI** legenda hoki negara lahir di Padang Kelab Kilat TNB."

NOR SAIFUL ZAINI

"**SUMBANGAN** TNB dalam membangunkan hoki negara sejak tahun 70-an amat besar."



POON FOOK LOKE



"**TANPA** bantuan dan sokongan TNB, tidak mungkin Malaysia mencipta sejarah

mendapat pingat perak Sukan Asia."

MOHD. MADZLI IKMAR MOHD NOR

"**SAYA** bangga kerana beberapa pemain remaja dari SSTMI diserapkan ke pasukan hoki senior negara."



LAILIN ABU HASSAN

TARIKH	21/5/2015	MUKASURAT	24
HARI	Khamis	RUANGAN	DALAM NEGERI



ANTARA aksi Mohd. Mazli Ikmar sebagai tonggak utama pasukan TNB dalam kejohanan liga Hoki Malaysia (TNB-MHL) yang berlangsung tahun lalu. Gambar - FB ARENA HOKI MALAYSIA